

UMNYANGO LOYA

ENHLITIYWENI



Nkulunkulu Somandla, uMcalisi wekuPhila lokuphakadze, uMniketi waso sonkhe sipho lesihle nalesiphelele, sita kuWe eGameni leNdvodzana yaKho letsandzekako, iNkhosi Jesu. Futsi siyaKubonga ngekutitfoba, Nkhosi, ngetibusiso Wena losiphe tona.

² Futsi ngikhulekela kutsi Utawutsintsa lodzadze manje logulako ndzawanatsite kuletetsameli leti. Tsine, njengeliBandla laNkulunkulu lophilako, manje sicela kutsi umoya lomubi lotolimata lodzadzewetfu utosuka kuye kute ajabulele tinkonzo kusihlwa eBukhoneni beliWundlu laNkulunkulu.

³ SiyaKucela, Babe, kutsi ubusise uMnaketfu Joseph Boze njengoba esuka aya e-Africa, nekuyoshumayela etincenyeni temhlaba. Vumela sandla saKho semusa simhole, Nkhosi. Umnike kuphepha, umnike imphilo nemandla, futsi kwangatsi angabuya kitsi futsi, atfokota, aletsa tinyandza letiligugu. Siphe kona.

⁴ Sitsetselele tono tetfu, njengoba natsi sibatsetselela labo labasonako. Futsi siyakhuleka manje kutsi Moya loyiNgcwele ngako konkhe utotsatsa lomhlangano ngaphansi kwekulawula kwaKhe futsi atfole ludvumo kuNkulunkulu Babe wetfu. Ngoba sikucela, eGameni laKhe. Amen.

⁵ Hlalani phansi. Anginalo lu—luhla lwemagama lasetjentiswako ekukhulumeni kusho kutsi ngiyitfokotela kanjani leChicago lenkhulu nelubambiswano lwabo kulobusuku lobendlulile lobusiphohlongo bemhlangano. Kuwo onkhe emabandla nakubantfu, kutfokotelwa kakhulu. Futsi ngiyabonga ngalehhola yeSikolwa LesiKhulu saseLane Tech, nakumgcini wayo nakubo bonkhe labo labangaphansi kwalesikolwa lesi, babenemusa kakhulu kitsi kutsi basivumele kutsi sibe naso.

⁶ Futsi ngifuna ikakhulukati kubonga umculo lomuhle nebahlabeleli. Lekwaya lencane yalabahlabela ngabane labasandza kuhlabela emizuzwini lembalwa leyengcile ye *Youth For Christ*, bavela eWisconsin, siyababonga. Nakubangani betfu labangemakhlati, ngicedza kungena egumbini lapho, futsi bebahlabela leluculo lebelifanele litamatamise soni siye phansi ngemadvolu aso, “O, lutsandvo lwaNkulunkulu, lucebe futsi lumsulwa kangaka!”

⁷ Bengicabanga, ngemuva kwalelo filimu lelivusa inshisekelo itolo ebusuku leMnaketfu Osborn lalikhombise lapha, ngebantfu

babo lapho e-Afrika balele bagula, futsi, o, sitiva sinemahloni ngatsi lucobo, ngekungabamikiseli liVangeli masinyane kunaloku. Kodvwa ngemusa waNkulunkulu sitokwenta, *ngitokwenta* konkhe lengingabentela kona lapho ngibuyela emuva futsi.

⁸ Futsi nangeMnaketfu Johnson u—umhlabeleli, usihlabelele kahle kanjani pho! Futsi siyamtfokotela. Nangemshayi wepiyano nabo bonkhe, nangebafundisi, lubambiswano lwabo. Nangawetfu loligugu, uMnaketfu Joseph lomncane; sewuphumile manje, ngiyakholwa.

⁹ Kodvwa Joseph ubengumngani sibili kimi, ngiyamtsandza lomfo lomncane. Futsi sime ngakulomunye nalomunye. Ngitsi, “mfo lomncane,” ngiyati kutsi mkhulu kunami, kodvwa kukhona lokutsite ngaye kutsi, o, uvele nje... Ngiyamtsandza nje, lomangalisako impela, umfo lomncane. Ngiyamtsandza ngoba uyayitsandza iNkhosi yetfu. Futsi ngimbonile Joseph etindzaweni letinengi letimatima, kodvwa angikase ngimbone atiphatsa ngaphansi kwemKhristu kuko konkhe lakwentile. Futsi ebumatimeni nasebululeni sime ngakulomunye nalomunye. Futsi kwangatsi Nkulunkulu angabusisa lutsandvo lwetfu kulomunye nalomunye sisachubeka.

¹⁰ Nakini nine labanye bomnaketfu labashumayelako lababesemihlanganweni, ngalelinye lilanga uma sekuphelile konkhe... Futsi cabangani nje, lapho onkhe lamakwaya lamakhulu abutsana ndzawonye, akunawumangalisa na?

¹¹ Ungahle utsi, “Mnaketfu Branham, uyakholwa kutsi batobe basasolo banelithalenta labo na?”

¹² Impela, impela, banikwa loko ingunaphakadze. Uma nicaphela, ngesikhatsi lomtsakatsikati wase-Enidori abita umoya waSamuweli, bekasolo angumprofethi. Ngako kufa kuphela kususisa endzaweni leyehlukile yekuhlala. Loku kwesikhashanyana nje, nalokwa kuPhakadze. Ngako silangatelele lolosuku.

¹³ Ngimvile uMnaketfu Joseph amemetela imihlangano, sitojabula kuba nawe. Nalawomakwaya netintfo, beta ngalapha kulemihlangano. Impela bengingakutsandza loko, futsi nginesiciniseko kutsi bantfu bebangakutsandza, nabo. Akukho lokufana nekuhlabela lokuhle, ngabe kukhona na? O, kuyamangalisa!

¹⁴ Manje, kusihlwa njengoba kubusuku bekuvala... Futsi kusobala ngihlala njalo ngikhatsele kancane futsi ngishe livi. A—anginaye umphatsi wemkhankhaso losemtsetfweni kuletikhatsi leti, kusukela wetfu lotsandzekako, uMnaketfu loligugu Ern Baxter, wadzingeka abuyele ebandleni lakhe, belimbata. Libandla lakhe licishe lilingana nalehhola. Ngako kutsi abehambahamba eveni lonkhe nami, libandla lakhe belingeke lisakumela loko, bekufanele abuyele emuva kubo noma

bekungenteka kutsi alahlekelwe libandla lakhe. Umphefumulo lomangalisako, indvodza lemangalisako yaNkulunkulu, futsi ngiyamtsandza.

¹⁵ Kodvwa bekafanele abuyele emuva, futsi kusukela ngalesosikhatsi, angikaze ngibe nameninja wemkhankhaso, ngako ngifanele ngitame kukhuluma, cobo lwami. Ngako, angikeneli ngaloko, ngoba angisuye umuntfu lofundzile, futsi angikwati kushumayela, siyakwati loko. Njengoba uMnaketfu Osborn ashito langembili itolo ebusuku, mayelana, watsi, akekho lokwatiko kancono kunaloko lakwenta, ngentsandvo yakhe yekuba lapha. Ngako, kodvwa hluphekani natsi sikhhashana, kodvwa ngiyatsandza kusho lengikwatiko ngaYe, ngoba ngiyaMtsandza.

¹⁶ Ngifisa kufundza kusihlwa incenye yemBhalo, futsi singeke sinihlalise sikhatsi lesidze kakhulu, bese-ke sitokhulekela labagulako. Futsi, o, inhltiyo yami ishe kanjani itolo ebusuku ngesikhatsi ngibona lelo lelikhulu, licembu lelikhulu lebantfu bangene etikhaleni tetitulo kwemukela kuphiliswa kwabo etisekelweni teLivi laNkulunkulu leliPhakadze, loko kuyijabulisile inhltiyo yami. Kwaletsa kukholwa kwami kini kutsi ngibone kutsi nitawukholwa ngco eVini.

¹⁷ UMnaketfu Osborn unenkonzo lenkhulu yekushumayela Livi. NeLivi liyomehlula develi nomakuphi, noma ngasiphi sikhatsi, ngaphansi kwanoma ngusiphi simo. Jesu wakufakazela ngesikhatsi ehlula Sathane, angasebentisi emandla aKhe, kodvwa nje eVini leYise, “Kubhaliwe. Kubhaliwe.” Futsi Wamehlula.

¹⁸ ENcwadzini yeSambulo saJesu Khristu, ne—nesahluko 3 nelivesi lema 20, ngifisa kufundza lencenye lena:

Buka, Ngime emnyango, ngiyanconcotsa: uma umuntfu eva liphimbo lami, futsi avule umnyango, Ngitawungena kuye, futsi ngidle naye, naye adle nami.

¹⁹ Lesi sihloko lesigcame kakhulu semBhalo. Kukhona lokutsi ngako kutsi njalo uma ngiwufundza, uyayijabulisa nje inhltiyo yami. Sitfombe seNkhosi inconcotsa emnyango.

²⁰ Angeke ngikhone kuletsa enkhumbulweni yami kulesikhatsi lesitfombe, noma, umdvwebi lesitfombe lesapendwa nguye walesigameko. Kodvwa tonkhe titfombe letidvumile, ngaphambi kwekutsi tike tibekwe ehholeni leludvumo, tifanele kucala tendlule kubagceki, bese-ke uma setendlulile kubagceki, khona-ke tingaya ehholeni leludvumo.

²¹ Kungaleyondlela ngeliBandla. Nkulunkulu udvweba sitfombe salelihle, liBandla lelingcwele, futsi ngaphambi kwekutsi Like lisuswe emhlabeni liye ehholeni leludvumo esigodlweni saNkulunkulu, Kucala kufanele lendlule elayinini lebagceki.

²² “Bonkhe labaphila ngekumesaba nkulunkulu kuKhristu Jesu bayohlushwa. Nibusisiwe uma bantfu bayosho lonkhe luhlobo lwebubi ngani ngalokungesiko ngenca yeliGama laMi.”

²³ Nalomdvwebi wadvweba sitfombe saJesu anconcotsa emnyango. Kwatsi nasesendlule kubagceki, lomunye wasukuma watsi, “Mnumzane, kunentfo yinye nje lengiyitfolako lengalungi ngalesitfombe, loko kutsi awunawo umshudo emnyango.”

²⁴ Nalomdvwebi watsi, “O, cha, ngisidvwebe ngaleyondlela.” Watsi “Lowomnyango ungumnyango loya enhlitiyweni, nemshudo ungekhatsi, *nguwe* lofanele uvule umnyango.”

²⁵ Futsi besingatibuta njengoba sibona kunconcotsa emnyango: Unconcotselani umuntfu emnyango na? Utama kungena, ufuna kungena ngekhatsi, kungalesosizatfu sakhe sekunconcotsa.

²⁶ Emadvodza lamaningi lamakhulu, kulomhlaba lobanti naseminyakeni yekubakhona bawo, inconcotsile eminyango. Futsi ngiyacabanga manje, bekuyokwentekani kube Khesari lomkhulu bekehlele emnyango wemuntfukatana futsi bekanconcotse emnyango? Ngesikhatsi lomuntfukatana avula umnyango futsi bekangabona kutsi bekungubani, anconcotsa, mhlawumbe bekayawuguca phansi futsi atsi, “Wemukeyekile, Khesari lomkhulu! Ngena endlini yami nje futsi ungihloniphile ngekungena endlini yami yekuhlala letfobekile. Futsi noma yini loyitfola ekhatsi lapha inhltiyo yakho leyifisako, yitsatse, ngoba yakho.”

²⁷ Bekuyokwentekani kube Adolf Hitler longasekho bekehlele emnyango walamanye emasotja akhe, futsi bekanconcotse emnyango? Nelisotja libuka ngephandle futsi libone kutsi bekungumcindzeteli lomkhulu waseJalimane na? Lelisotja belitawuvula nge umnyango futsi lime lishaye indesheni, futsi lisaluthe umcindzeteli lomkhulu waseJalimane futsi limcele kutsi angene, “Futsi noma yini loyifunako endlini yami, yitsatse, yakho.”

²⁸ Kube Hitler bekatsite, “Ngitotsatsa lelowashi legolide lelibekwe elubondzeni kube sikhumbuto.” Nomangabe belingaba ligugu kangakanani, lelisotja beliyohlonishwa kutsi linikete into lenjengaleyo kumcindzeteli waseJalimane.

²⁹ Niyati, sizatfu, bumcoka bemuntfu loseemnyango wakho. Uma umuntfu lomcoka eta kutokuvakashela... Akukho iDemokhrathi lenhle kuyo yonkhe iChicago kusihlwa, kodvwa leyo lebeyitotivela ihlonishwe kakhulu uma uMengameli Dwight Eisenhower anconcotse emnyango wakhe. Naloku nje ehluka kuye kutembusave, noko ungumengameli wase-United States yaseMerica, uyindvodza lemcola, futsi nje noma ngumuphi umDemokhrathi lokahle angakutfokotela loko, kuhltonishwa kwekuba nemengameli wale-United States, uMengameli Dwight Eisenhower kutsi anconcotse emnyango wakhe.

³⁰ Bekayotsi, “Ngena, mnumzane. Futsi noma yini lengingayenta kukwenta utfokomale useselapha! Ngena.” Inhlitiyo yakhe beyitojabula kwati kutsi umengameli wase-United States bekanconcotsa emnyango wakhe. Ngoba bekatokwati kutsi umengameli bekanemsebenti wakhe, noma ku, intfo letsite kumtjela yona, noma nakungenjalo bekangeke anconcotse emnyango.

³¹ Madvutane nje indlovukazi yaseNgilandi beyivakashele sive sakitsi lesitsandzekako, indvodzakati yeNkhosi George lesengasekho, lobekuyinhlanhlaa kimi, ngemusa waNkulunkulu, kutsi ngimkhulekele ngesikhatsi aphiliswa esifeni sebucopho nemgogodla. Futsi yena alapha e-United States, kube bekangefika kunoma ngumuphi weminyango yetfu futsi wanconcotsa emnyango, besiyohlonishwa kakhulu kuba nendlovukazi yaseNgilandi inconcotse emnyango wetfu. Naloku nje singesito tikhonti takhe, kodvwa ubaluleke kakhulu, kungako besiyotivela sihlonishwa ekunconcotseni kwakhe emnyango wetfu. Unguwesifazane lomcoka, uyindlovukazi lenkhulu kunato tonkhe emhlabeni, nasukhuluma ngekwelive lonkhe. Futsi besitawuba nekuhlonishwa ngekutsi afike.

³² Kodvwa, o, ngubani lomcoka kakhulu kunaJesu na? Futsi ngubani lojikiswe kakhulu kunaJesu na? Ngubani lomkhulu kunaYe na? Kepha noko Umile futsi unconcotsa nsuku tonkhe, futsi siyaMjikisa. Ufuna kungena enhlitiyweni yetfu kute Asibusise, futsi asentele loko lokungekho nkhosi, noma umbusi lenemandla, noma ngumuphi lomunye umuntfu lomcoka lebekangakwenta, kepha noko siyaMala. Nsuku tonkhe, tinkhulungwane letiphindvwe katinkhulungwane tiMcosha emnyango wenhlitiyo yabo.

³³ Kukuhlonishwa lokukhulu kunako konkhe noma ngumuphi wesilisa, noma wesifazane, noma umntfwana longake abe nako kuba neNkhosi Jesu kutsi anconcotse emnyango wenhlitiyo yakho, iNkhosi yemakhosi neMbusi webabusi, kepha noko Ujikiswe kakhulu kunemuntfu weliphephandzaba, noma umtsengisi wencwadzi, noma inkapane yemabrashi, noma i, lomunye umuntfu lotela kutotsatsa kuwe, esikhundleni sekukupha.

³⁴ Futsi akekho lomunye longanconcotsa emnyango wakho nesiphiwo lesinjengaleso Lanaso sakho, ngoba Lanako kwakho kuPhila lokuPhakadze, Unekuphiliswa kwemtimba wakho, Unenjabulo ngelusizi lwakho, Unekuthula kwemcondvo wakho lokhatsatekile, Unelitsemba lekungabata kwakho, kukholwa ngekwesaba kwakho, kungaboli ngenca yekubola kwakho, kuPhila ngekufa kwakho, futsi sisasolo siyaMjikisa.

³⁵ Kodvwa ungahle utsi kimi, “Mnaketfu Branham, sengivele ngikwentile loko. Ngesikhatsi Jesu anconcotsa enhlitiyweni yami, ngiMvumele wangena.”

³⁶ Yebo-ke loko kuhle. Kodvwa ngesikhatsi Angena enhlitiyweni yakho, waMemukela yini ebuntfwini bakho bonkhe na? Kunebantfu labanengi labatokwemukela Jesu njengeMsindzisi, kodvwa Angaba yini yiNkhosi yekho na? *INkhosi* kuba “bunikati,” iNkhosi inemandla ekulawula ngalokuphelele. UngaMemukela ngalokucicimako kutsi akugcine ungayi esihogweni nasekuhlushweni, bewuyoMemukela njengeMsindzisi wakho, kodvwa uyavuma kuMemukela njengeNkhosi yakho kukulawula ngalokugcwele na?

³⁷ Enhlitiyweni kuneminyango lemincane, njengasendlini yakho. Uma ngita endlini yakho kutokuvakashela, futsi ungemukele ngingene, futsi watsi, “Mnaketfu Branham, ngikunika lendlu nako konkhe lokungekhatsi kuyo.” Kodvwa-ke ungibambe ngesandla, bese utsi, “Uyawubona lomnyango *lona*? Angifuni ungene lapho. Futsi uyayibona lendzawo *lena*? Manje, ungangeni lapho. Nalendzawo *lena*? Ungangeni lapho,” khona-ke nje ngemukeleke incenye. Futsi nguleyondlela bantfu ngalokwejwayelekile labayemukela ngayo iNkhosi Jesu, ngekwemukelwa incenye. Kodvwa Ufuna kungena futsi emukeleke.

³⁸ Manje ake sihlrole leminye yaleminyango. Lomunye wayo ungumnyango lomncane wa*Mine*. Niyati, lowo ngulomcoka, umnyango lomncane. Wena utsi, “O, yebo, Jesu, ngitoKwemukela njengeMsindzisi wami, kodvwa manje, ungagcumkeli emsebentini wami.” Leso simo sekutiphatsa semaKhristu lamanengi, *labitwa kanjalo*. “Manje, ngifuna kuphila imphilo yami lucobo, kodvwa angifuni Wena . . . Ngifuna Wena ungigcine ngingayi esihogweni, kodvwa ungagcumkeli etindzabeni tami.”

³⁹ Yebo-ke khona-ke, Jesu angeke abe nendzawo yekucala, Jesu angeke abe yiNkhosi yakho, ngoba ufuna kuba ngumbusi wakho lucobo, futsi Yena ufuna kubusa esikhundleni sakho. Kodvwa kuphela nje uma ugcina umnyango uvaliwe, naloku nje uMemukele njengeMsindzisi locondzene nawe, noma kunjalo awukaMniki ngalokuphelele indzawo yekucala ekuphileni kwakho. Futsi, o, bandla, akusilo yini liciniso lelo eveni lonkhe na? Bangeke baMvumele abuse njenge Nkhosi.

⁴⁰ Bese-ke kubakhona lomunye umnyango lomncane, ubitwa ngemnyango loya e*Bugovini*. O, sitsandza kanjani kugadza lowomnyango lomncane ngenkanankana lenkhulu! “Ngitawehla uma ngabe kukhona lengitakutfolo, noma uma ngabe kukwami nelibandla lami, noma mine nelihlelo lami. Ngitovuma kuhamba uma ngitfolo lokutsite kuko.” Lobo bugovu! Ufanele uvule lowomnyango futsi uvumele Jesu angene. O, ngumnyango lomcoka.

⁴¹ Manje, angikacondzi kuba luhlata, kodvwa ngicondze

kuphela kwetsembeka. Futsi-ke kunemnyango lomncane lotfolakala enhlityweni yabo bobabili besilisa nebesifazane, ngumnyango lomncane we*Kutikhukhumeta*. Futsi kuloko utawutsi, “Ngena, Nkhosi, ngitojoyina libandla lakho, futsi ngito—ngitokhokha kweshumi kwami, ngitosita kutsengela umfelokati emalahle, ngitsengele intsandzane kudla lokutsite noma timphahla letitsite, kodvwa nje angifuni kunikela kutikhukhumeta kwami. Ngicabanga kutsi nginconywa nje kuna*S’bani-bani*.” Jesu angeke abe nguMbusi, ke, webunguwe bakho.

⁴² “Ngitokwehlela kulelobandla lelitsite, yimishini lencane, ngiyeva kutsi banemvuselelo, kodvwa angeke wati ummango wami wati kutsi ngihlangana nalelicembu lebantfu, ngaletinye tikhatsi bodeveli baze batsi bebabagiciki labangcwele.” O, loko kukulimata kanjani kutikhukhumeta kwakho! “Angikhonanga nje kuvula lowomnyango, Nkhosi.” Khona-ke Angeke abe nguMbusi neNkhosi uma ugcina umnyango wakho uvaliwe.

⁴³ Futsi ngalesinye sikhatsi bengisolo nginelicala lekusho kubodzadze kutsi ngesikhatsi sasehlobo abagcoki kahle ngaletito letincane, timphahla letibukeka tingakazitsi. Ngiyati kutsi utsi ba—bayatitsengisa. Yebo, futsi batsengisa umshini wekutfunga, futsi.

⁴⁴ O, ufuna kubukeka njenge bakaJones, ufuna kutiphatsisa kwamakhelwane wakho, kodvwa Nkulunkulu ufuna utiphatsise kwemntfwana waKhe futsi usuke kuloko kutikhukhumeta. Umnyango we*Kutikhukhumeta*! Kuyintfo lembi kabi kwati kutsi utisho kutsi ungumKhristu, bese-ke ugcina umnyango uvaliwe kuYe!

⁴⁵ Indzatjana, mhlawumbe nginitjelile, kodvwa etinsukwini tasekucaleni tetigcila eNingizimu kwakukhona...Bebendlula futsi batsenge labobantfu futsi bente tigcila ngabo. Futsi bebadzabukile, ngoba bebakhashane nelikhaya labo, futsi bebavele bangasakhoni kutiva kamnandzi, bebangeke basabuyela ekhaya. Futsi bebabhacabulwa, bashaywa yonkh’indzawo, kwaze kwaba ngulapho bantfu bonkhe bashonelwa phansi ngumoya.

⁴⁶ Futsi ngalelinye lilanga umtsengi wetigcila wefika lapho, futsi bekatsenga tigcila epulazini letihlahla. O, wacaphela lenye yalawomadvodza, umfo lomncane eme acondzile, silevu sakhe sibheke etulu, futsi bebangadzingeki kutsi bambhacabule, bekasemsebentini ngo. Ngako lomtsengi wetigcila watsi, “Ake ngibe nalesosigcila, ngitokunika linani lakho ngaso.”

Nalomnikati watsi, “Kodvwa akatsengisi.”

Watsi, “Yini lesenta sehluke kakhulu kuleletinye tigcila na? Ngabe singubasi na?”

Watsi, “Cha, usigcila nje.”

Watsi, “Ngabe umondla ngalokwehlukile kuleletinye tigcila na?”

Watsi, “Cha, udla ekamelweni lekuphakela nato tonkhe letinye tigcila.”

Watsi, “Khona-ke mhlawumbe, mhlawumbe, kutsi uphatfwa kanconywana.”

“Cha, siphatfwa nje njengato tonkhe leletinye tigcila.”

Watsi, “Yini lesenta sehluke kakhulu kangaka, ke, kunaletinye tigcila?”

⁴⁷ Watsi, “Ngatibuta sikhatsi lesidze cobolwami, kodvwa ngatfola ngalelinye lilanga kutsi ngesheya emaveni endzabuko uyise uyinkhosi yesive. Futsi, noko, yena angumfokati akhashane nelikhaya, usati kutsi uyindvodzana yenkhosi, futsi utiphatsisa kwayo.”

⁴⁸ O, tsine maKhristu, naloku nje sehlukani siwe nelive, futsi sitikhonti letiphikelele eZulwini teNkhosi Jesu, sifanele sitiphatse njengemadvodzana nemadvodzakati aNkulunkulu. Kutikhukhumeta kusivimbela kutsi sikwente, siyesaba kutsi umuntfu lotsite utosho lokutsite lokumelene natsi. Uma uMoya ubusisa, labanengi banemahloni kutsi batsi, “Amen.” Kunalabanengi labasemsebentini wabo welihhovisi, iNkhosi Jesu beyingabaphilisa etifeni, futsi bayesaba kufakaza ngenkhatimulo yaNkulunkulu ngenca yekutikhukhumeta. Labanengi bayesaba kuma futsi batsi, “Ngemukele Khristu njengeMsindzisi locondzene nami futsi ngagcwaliswa ngaMoya loyiNgewe!” Lihlazo!

⁴⁹ O, ngiyalitsandza leluculo lelidadlana lesasivame kulihlabela eminyakeni leyendlula, entasi eveni letintsaba:

Ngitawutsatsa indlela nalabayingcosana
labadzelelekile beNkhosi.

Ngicale kungena naJesu, futsi ngiyendlula,

⁵⁰ Angenamahloni ngeliVangeli. Pawula watsi, “Lingemandla aNkulunkulu.” Kutikhukhumeta, o, kuyintfo lenkhulu kanjani pho!

⁵¹ Khona-ke kunalomunye umnyango lomncane enhlityweni yakho. O, kunaleminengi yayo, kodvwa nje ngifuna kushaya leminye yayo lemicoka. Lomunye umnyango lomncane enhlityweni uma Jesu angena ngumnyango weKukholwa. O, labanengi bayotsi, “NgitoMemukela njengeMsindzisi locondzene nami, kodvwa angikholwa kutsi lonkhe Livi liphefumulelwe.” Khona-ke ugcina umnyango wakho uvaliwe, Angeke akubusise nhlobo.

⁵² Futsi wena utsi, “O, ngiyakholwa kutsi Uyangisindzisa esonweni, kodvwa nje angikholwa kutsi tinsuku temimangaliso tiyafana namuhla njengoba betinjalo ngalesosikhatsi.” Khona-ke ugcina umnyango wakho uvaliwe, Angeke akwentele lutfo.

⁵³ O, kusihlwa kulenkonz o yekuphilisa, kube kuphela besingavula lowomnyango futsi sityi, “Nkhosi Nkulunkulu Jehova, ngikholwa kutsi lonkhe Livi Lowalisho liliciniso, futsi Libhaliwe, wabekwa luphawu ngeNgati yeNkhosi Jesu, Simemetelo, neSetsembiso kimi, futsi LiyiMphahla yami, futsi Lingelami,” o, umhlangano lonje pho lobewuyoba lapha kusihlwa! “Kwami. Jesu wafa kute ngibe nalokukholwa loku.”

...loyo lota kuNkulunkulu kumele akholwe kutsi ukhona, futsi...ungumvuzi walabo labamfunisisa ngekutimisela.

⁵⁴ O, kuvula lowomnyango weKukholwa futsi uvumele iNkhosi yeNkhatimulo ingene kuwo! Khona-ke utawubese uyakhona kubona tintfo letinkhulu, futsi ukholwe ngayo yonkhe inhltiyo yakho kutsi Jesu Khristu unguye itolo, namuhla, naphakadze, kubonakalisa kwaKhe kwelutsandvo lwaKhe neMoya uyotfululelwa etikwakho.

⁵⁵ Ngifisa kushaya lomunye umnyango umzuzwana nje, nalowo ngumnyango wemehlo akho. LiBhayibheli lasho kutsi sifanele sitsenge umutsi wekugcobisa eMehlo eNkhosini.

⁵⁶ Niyati, ngingumningizimu, nasentasi eveni lapho sihlala khona, emuva le eveni letintsaba taseKentucky, bantfwana bebavamise kuba nemehlo labuhlungu. Namkhulu wami bekavamise kutingela, futsi bekavame kutingela tingwe, futsi bekatsatsa lesi singwe bese uchonchisa lamafutsa. Futsi uma labanye bebantfwana bebabanemehlo labuhlungu... Ngelokuvamile utfola emehlo labuhlungu uma ulele.

⁵⁷ Kulapho-ke la emaKhristu atfola khona emehlo labuhlungu, nawo, uma balele etintfweni telive...[Akucoshwanga etheyiphini—Umhl.]...emehlo abo aya ngekuba buhlungu. Ubuka mabonakudze lomnengi kakhulu, mhlawumbe, nakanjani, utokwenta emehlo labuhlungu.

⁵⁸ Futsi besivamise kutsatsa lamafutsa esingwe, bese siyawashikisha, siwahlikihle emehlweni abo, aze emehlo abo avuleke.

⁵⁹ O, kodvwa ezingeni lakamoya, Nkulunkulu unemaFutsa laNgcwele, Moya loyiNgcwele, futsi Uhlikihla inhltiyo ngemandla ekuvuka kwaKhe, aze emehlo akamoya avuleke futsi abone inkhatimulo yeNkhosi. O, sidzinga kangakanani kuhlikihlwa kwemehlo, kute emehlo etfu ekucondza kwetfu avuleke!

⁶⁰ Bese-ke lenye intfo, uma emehlo akho avuleka ungakhona kubona, ungahle uve, kodvwa emehlo akho ayavuleka, sewungabona, bese-ke uma emehlo etfu sekavulekile, singakubona kulunga kweNkhosi. Kunetikhatsi letinyenti lapho Nkulunkulu ahamba nawe, Akugcine ekubhujisweni, Wakukhipha esibhedlela, kepa uchubeka nje kwangatsi bewunjengengulube ngaphansi kwesihlahla semahhabhula.

Leso sisho saseningizimu. Niyati, ingulube lendzala ingafinyelela ngaphansi kwesihlahla semahhabhula, nemahhabhula ayoyishaya enhloko lusuku lonkhe, futsi itawuvele iwatsatse nje iwadle ingakase ike ibuke etulu laphe avela khona.

⁶¹ Nguleyondlela emaKhristu lamanengi lenta ngayo, tibusiso teNkhosi tiwa ndzawo tonkhe kubo, kepha abake nje baguce ngemadvollo abo kucondza kutsi tivelu kuNkulunkulu. Kudzabukisa kanjani pho! Emehlo etfu adzinga kuvuleka.

⁶² Futsi lesinye sizatfu emehlo etfu afanele avuleke, loko kungesikhatsi nasingena endlini yeNkhosi futsi sibona uMoya waKhe ucala kunyakata nekwenta tintfo ngendlela nje Latsi kuyokwentiwa ngayo, futsi sihleti nemehlo etfu avaluwe. Manje, ngiyati kutsi loko kuliciniso. Bahlala nemehlo abo avaluwe, futsi batsi, “Yebo-ke, angati, kungahle kube kufundza ingcondvo loko, futsi kungahle kube ngumbhuli.”

⁶³ Kodvwa kube emehlo akho bekavulekile, Jesu bekangangena, futsi atsi, “NgiMi neLivi laMi.” Kodvwa ufanele uvule emehlo akho, bese-ke ubona kulunga kwaKhe futsi ungakutfokotela konkhe loko Lakwentela kona.

⁶⁴ Esikhatsini lesitsite lesendlulile, entasi le emaveni aseNingizimu, bekunemfundisi weliVangeli, futsi bekanendvodza lebeyimsebenzela, indvodza leliphatsi, neligama layo, bebambita ngaGabe. Libito lakhe lelingilo bekunguGabriyeli, kodvwa bebambita ngekutsi nguGabe ngekulinciphisa. NaGabe bekangumfo lomdzala lolungile, kepha nje bekangakhoni kubasemgweni neNkhosi, akunandzaba kutsi besiyokwentani, bekavele nje, aphume emgweni. Bekatsandza kudlala emadayisi nemakhadi, futsi anatse inkantini lencane, futsi nje bekangakhoni kuhlala asemgweni.

⁶⁵ Futsi Gabe bekatsandza kutingela kahle impela, kodvwa bekangakhoni kunemba lutfo, nemelusi walelibandla lelitsite, bekatsandza kutingela, naye, ngako ngalelinye lilanga ngesikhatsi baphumile batingela futsi bebadubule tinyamatane letinengi kakhulu, baze bologwaja netinyoni tatilenga etikwabo bonkhe. Futsi kwase kuhambe sikhatsi kusihlwa, futsi bebata ngalenywe lencane, indlela leyejwayelekile, akekho lobekashito lutfo imizuzu lembalwa.

⁶⁶ NaGabe lomdzala alayishile asensa nje tinyamatane, atatabuka eceleni kwendlela, ngemuva kwesikhatsi watsintsa umfundisi ehlombe, wase uyagucuka, futsi lokwammangalisa, tinyembeti betehla etihlatsini taGabe lomdzala. Wase utsi, “Mfundisi, uyati kutsi ngitokwentani?”

Watsi, “Cha, Gabe, utokwentani?”

Watsi, “Ngitokuta ngco entasi ebandleni lakho ngeliSontfo ekuseni, *mine* ngitotfolu sikhundla sami, indzawo, khona entasi ebhentjini *lalabalilako*, futsi *mine* ngitongena futsi

ngihlanganyele ebandleni. Futsi ngitawuphila ngekwetsembeka kuNkulunkulu ngize ngife.”

⁶⁷ Nalomelusi, atsite kubanekutsintseka kulesincumo lesisheshako saGabe, emvakweminyaka etama kuncenga lomfo lomdzala kutsi abe ngumKhristu, watsi, “Gabe, awati kutsi ngikutsakasela kanjani loko, ngijabula kanjani kutsi wena usho lawomavi ngeNkhosi yetfu, nangesincumo sakho. Kodvwa kunentfo yinye lengikhatsatako, Gabe, emvakwako konkhe kushumayela kwami, futsi ngakubutsa esitaladini futsi ngakuyisa kumkakho ekhaya ngesikhatsi udzakiwe kukuvimbela kutsi uboshwe, nato tonkhe letintfo lengitentile, kepha noma kunjalo angikakhoni kukutfola kutsi ute futsi ujoyine libandla futsi usindziswe: Yini leyente loluntjintjo lolushesha kanjena, Gabe?”

Watsi, “Mphatsi, uyati kutsi *bengingakwati* kudubula, bengineke sengikhone ngisho kushaya munye logwaja.” Wase utsi, “Buka lapha kulabologwaja netinyamatane Langiphe tona, impela Ufanele kungitsandza, noma nakungenjalo Bekangeke anginike tona.”

⁶⁸ O, kulula, kodvwa kube kuphela benitati tibusiso leninato letivela esandleni saNkulunkulu, letimphahla lotigcokako, kudla lokudlako.

⁶⁹ Kube nake naba kumishini kulawomasimu futsi nabona letotinswane letincane netisu tato letincane tikhukhumukile, tilele esitaladini, tibulawa yindlala, futsi ucitsa emgcomeni wetibi lokwenele kubondla, bewungaguca ngemadvollo akho bese utsi, “O Nkulunkulu, bengisolo nginesibhuku kakhulu!” Kucondza kulunga kwaNkulunkulu.

⁷⁰ Bangakhi bantfu lebebatawuba sesihogweni kusihlwa, lebeahlala kuletihlalo lapho nihleli khona, lebeanganiketa nomangabe yini kube bebangaphindze babuyele esihlalweni sabo kusihlwa futsi batfole lelitfuba lekufika!

⁷¹ Kulunga kwaNkulunkulu, sikutsatsa nje kalula. Muhle kakhulu kuta kitsi ngalolu tinsuku tekugcina lapho emahlelo, nekunyakata lokukhulu ngekumelana naNkulunkulu, nato tonkhe tinhlobo temachinga emshina, nayo yonkhe intfo yekutijabulisa kutsatsa indzawo yelibandla, tonkhe tinhlobo tekutijabulisa, kepha noko bafulatsela Khristu. Kepha noko Uta kitsi ngebuhle baKhe kutsi Atembule kitsi njengalofanako itolo, namuhla, naphakadze. Kungetulu kwanomayini, njengoba labobantfu labatsandzekako bahlabelile esikhashaneni lesendlulile, kwendlulela ngale kwenkhanyeti lephakeme kunato tonkhe, futsi kufinyelele esihogweni lesiphansi kunato tonkhe kwati kulunga kwaKhe, eme anconcotsa, atama kungena.

⁷² Kucabangeni umzuzwana nje, sisakhotsamisa tinhloko tetfu sentela umkhuleko.

⁷³ Ngabe unelicala lekudla kudla lokukahle, ujabulela kubona lokuhle, ugcoka timphahla letinhle, ushayela imoto lenhle, uphila eveni lelihle kakhulu, uya esikolweni lesihle, nato tonkhe tibusiso lesitijabulelako, kepha noko awukaze ubuke etulu kubona kutsi kuvelaphi? Ngabe unelicala?

⁷⁴ Ungeke yini kusihlwa, ngesikhatsi Anconcotsa emnyango wakho, wente lokwenene nje kutsi ufinyelele ngesekudla sakho, futsi utsi, “Nkhosi, manje ngivula umnyango, ngena, O Nkhosi yeNkhatimulo, futsi ungisindzise futsi uvule iminyango yenhltiyo yami, ngivula umnyango wami *weKukholwa*, umnyango wami *weKutikhukhumeta*, umnyango wami *weKungangenelani*, umnyango wami *weBugovu*. Yonkhe iminyango yenhltiyo yami ngijika lena ngiyivulela kuWe, O Nkhosi Jesu Lome akhona manje.”

⁷⁵ Ungakwenta yini ngekuphakamisa sandla sakho nje lapho wonkhe umuntfu asakhuleka? Nkulunkulu akubusise, kulo lonkhe libandla. Kunetandla letinengi, ngingeke ngitibale tonkhe, kodvwa Nkulunkulu ubona wonkhe umuntfu.

⁷⁶ Kutsiwani kuvulande losesitezi etulu lapho? Niyati kutsini? Ngekukhuluma ngekwemumo wemhlaba, usondzele kancane nje eZulwini kunaloko labangiko entasi lapha. Kunjalo, phakamisani tandla tenu, futsi nitsi, “Nkulunkulu, ngifuna kucondza kusihlwa kutsi Jesu, iNdvodzana yaNkulunkulu, unginika yonkhe intfo lengiyidlako, tonkhe timphahla tami, nekwami... noma yini Langinika yona, Nkhosi, ngiyaKubonga, futsi ngifuna kuvula inhltiyo yami, umnyango wami *weKukholwa*, ngifuna Wena ungene futsi utsatse lokungekwakho. Futsi ngifuna uvule emehlo ami. O Nkhosi, ngihleti emihlanganweni, ngimvile uMnaketfu Branham nalabanengi bebafundisi bakhuluma ngaWe ngekuba nguye itolo, namuhla, naphakadze, futsi ngitame kamatima kukukholwa loko. Futsi ngiwabonile impela emandla aKho efika futsi asombulula timfihlo tenhltiyo. NgiKubonile ukhuluma ngenceku yaKho kubantfu labangakejwayeleki mbamba futsi ngati kutsi bebabobani, tono lebebatenta, kugula lobekusemitimbeni yabo, futsi ngikubonile Ubaphilisa kuyo yonkhe indlela yekungaboni, kugula, kuhlanya, futsi ubakhululile, futsi ngandlela tsite ngigcine umnyango wami lucobo lomncane *weKukholwa* uvaliwe. Nkulunkulu, ngihawukele kusihlwa,” utsi, “futsi uvule umnyango wami *weKukholwa*.”

⁷⁷ Labobantfu bangatiphakamisela tandla tabo kuNkulunkulu? “Vula umnyango wami, Nkhosi.” Nkulunkulu akubusise. Kunjalo. Nkulunkulu akubusise. “Vula umnyango wami *weKukholwa*, Nkhosi, ngiwuvulela Wena. Ngena, ube yiNkhosi, ube nguMbusi. Ngitsatse njengoba nginjalo, angisuye lokahle.”

⁷⁸ Sewungavele ukuvume nje. “Uyini umuntfu kutsi Wena bewungacabanga ngaye?” Angikacondzi loku ngebuluhlata, ngiyantsandza, naNkulunkulu uyanitsandza, kodvwa ngaphandle kwaNkulunkulu anikalungi, empeleni. Ungemafidi lasitfupha nje elutfuli lapho uya khona futsi nguloko-ke, emphefumulweni loyesihogweni. Kodvwa uma utelwe kabusha, ungumntfwana waNkulunkulu, vula umnyango wakho ke, futsi uMvumele abe nebuKhosi ebunguweni bakho.

⁷⁹ Mbukeni, Lakwentako, nisakhuluma naYe manje. Bukani Phetro ngesikhatsi efika, Jesu bekati kutsi bekangubani, Watsi, “Wena unguSimoni, futsi emvakwaloku utawubitwa ngaPhetro. Neligama lababe wakho nguJonase.”

⁸⁰ Watjela Filiphu lapho Nathanayeli amtfole khona, noma, Nathanayeli lapho Filiphu amtfole khona.

⁸¹ Kantsi futsi Bekayati imfihlo yenhlitiyo yewesifazane waseSamariya.

⁸² Lowo lowatsintsa sembatfo saKhe, Wagucuka, wabuka.

⁸³ Wayibona imicabango yebantfu labatsi BekanguBhelzebule.

⁸⁴ Usenguye kusihlwa. Watsi, “Letintfo leti leNgitentako nani nitotenta.” [Akucoshwanga etheyiphini—Umhl.]

⁸⁵ ...nekutsi Utongena enhlitiyweni yabo njengeNkhosi neMsindzisi. Busisa labo labaphakamise tandla tabo lesebavele baKwemukele, kodvwa abakawuvuli ngalokugcwele wonkhe umnyango enhlitiyweni yabo. Siphe, Nkhosi, kutsi wonkhe umnyango ungavulwa khona manje, kutsi iNdvodzana yeNkhatimulo itongena. Futsi gcoba emehlo abo kute babone inkhatimulo yaKhe neBukhona baKhe. Titfolele ludvumo kuWe lucobo, Nkhosi. Ngoba mine, njengenceku yaKho, ngibetfula kuWe njengemiklomelo yalomlayeto. EGameni leNkhosi Jesu. Amen. [Akucoshwanga etheyiphini—Umhl.]

⁸⁶ ...labanengi labakholwa bengetwa eBandleni. Bakholwa futsi bemukela Khristu. Kodvwa ngiyatsandza kubona i-altari nebantfu bakuyo, baphendvuka. Akunandzaba kutsi ukhale kangakanani, kutsi uncenge kangakanani, kuze kukholwa kwakho kubuke lapho futsi waMemukela njengeMsindzisi locondzene nawe, bekungeke kukusite ngalutfo kukhuleka noma ukhale.

⁸⁷ Phetro watsi, “Phendvukani, ngulowo nalowo wenu, futsi nibhabhatiswe eGameni laJesu Khristu kuko kutsetselelwa kwetono tenu, khona ke nitakwemukeliswa Siphiso saMoya loNgcwele. Ngoba lesetsembiso senu nesebantfwana benu,” nalabo labaseChicago, “nalabanengi labakhashane, bonkhe nje iNkhosi Nkulunkulu wetfu leyobabita.” Futsi uma uphakamise sandla sakho, Usasolo abita. Mkholwe Yena manje.

⁸⁸ Ngiyatibuta ngaphambi kwekutsi sicale umhlangano kutsi ngingasho loku: Hamba uye ebandleni lelitsite lelihle,

manje, futsi ubhabhatiswe, futsi ubite liGama leNkhosi, futsi Utokunika umbhabhatiso waMoya loyiNgcwele. Manje, ngentele loko, ungeke na? Akunandzaba kutsi nguliphi libandla lotihlanganisa nalo, kuphela nje uma wemukela Moya loyiNgcwele, loko kuyakucatulula, uyindvodzana nendvodzakati yaNkulunkulu.

⁸⁹ Futsi ngikhohlwe intfo letsite iNkhosi lengikhumbute ngayo: Bangitjelile kutsi bangitsatsele umnikelo wesihle esikhashaneni lesendlulile. Bekungadzingeki, angikaze ngitsatse umnikelo emphilweni yami, banaketfu ngalokwejwayelekile bayefika futsi banginike lokutsite kutsi ngiphile ngako. Ngiyabonga ngako.

⁹⁰ Angikacondzi kuba luhlata, ngiyacalisa. Ngitsatseleleni ngekukhohlwa kusho leyontfo lemcoka leniyentile, ngiyayitfokotela. INkhosi inibusise. Utohamba, ngekwati kwami yonkhe, uye eMbusweni weNkhosi. Nguyonandlela kuphela lenginayo yekuphila futsi ngondla umndeni wami nguloko leninginika kona ngaleyonhloso, nomayini lengetulu kwaloko iya ngco emisebentini yetenkhlo. Ngako uma ngiphendvula ngaloloSuku, ngifuna Atsi, “Kwentiwe kahle, nceku yaMi lenhle naletsembekile.” Lawo ngemaVi lengilangatelela kuweva: “Wente kahle.”

⁹¹ Manje, ngabe bakhona bantfu lapha longakaze abe kulomunye wemihlangano yetfu phambilini? Ningatiphakamisa nje tandla tenu, lesi sikhatsi senu sekucala? O, loko kuhle kakhulu. INkhosi inibusise, kakhulu. Cishe emakhulu lamabili noma lamatsatfu ebantfu, ngiyacabanga, longakaze abe semihlanganweni.

⁹² Manje ngifuna kutsatsa nje lomzuzu wesikhatsi, lokusesekuseni noko, nginichazele kutsi ngicabangani ngekuphilisa kwaNkulunkulu. Manje, niyati, kululuhlobo lwenkonzo, ninato tonkhe tinhlobo temagama, nalamanye awo akatfokotisi kahle, kodvwa, noko, akukuntjintji nakancane ngaNkulunkulu. BekanguBhelzebule kubantfu bangalolosuku lebebangaMkholwa. “Futsi uma babita iNkhosi yendlu ngaBhelzebule, bayobabita kangakanani-ke baleyondlu?”

⁹³ Kodvwa ngalokufanako nje, liVangeli lichubeka ngco, futsi ayikho indlela yekulimisa. Kufana nendlu leshako emoyeni lohusha kamatima, lithchubekela embili. Akekho lotomisa liVangeli, liyotsatsa timphandze talo etinhltiyweni, akunandzaba kutsi bahlupha kabi kanjani. Lomunye... Nkulunkulu angamvusela Abrahama bantfwana kulamatje lawa.

⁹⁴ Futsi manje, kulolusuku ngiyati kutsi kuyintfo—intfo lenhle kakhulu kutsi ungacaphela loko lokuvako, ngoba, kimi, ngikhohwa kutsi Nkulunkulu angenta tintfo letinengi Langakatibhali eVini laKhe, ngiyati kutsi UnguNkulunkulu,

Wenta noma yini Layifisako, kodvwa, kimi, ngiyatsandza kutsi kuphume eVini, khona-ke ngicinisekile.

⁹⁵ EThestamentini leLidzala bebanendlela yekuhlola kutsi ngabe umprofethi bekacinisile yini noma cha, kwakunge-Urimi neThumimi. Nani bafundzi beliBhayibheli niyati kutsi loko kwakuyini, kwakukuKhanya lokungetulu kwemvelo lokwakuvula esivikelweni sesifuba sa-Aroni, lokwakubonisa imibala leyehlukenene. Futsi uma umphuphi noma umprofethi akhuluma, futsi akunandzaba kutsi kuvakala kungiko sibili kanjani, uma i-Urimi neThumimi ingakubonakalisi loko lokungetulu kwemvelo, kwakungenjalo.

⁹⁶ Futsi kulobo buphristi i-Urimi neThumimi yasuswa, kodvwa kulobuphristi lobu beNkhosi sinalenye i-Urimi neThumimi, lelo Livi laKhe. Uma kungabonakalisi eVini, nginekukusolasola kancane loko.

⁹⁷ “Ngoba nomangubani loyosusa, noma engete kunomayini lebhalwe kuleNcwadzi...” Niyatati letinsongo taleNgelosi eSambulweni. Angifuni lokungetulu kwaloko lokukuYo, futsi angifuni lutfo *lolungaphansi* kwaloko lokukuYo, ngifuna nje loko Lakwetsembisa.

⁹⁸ Futsi bengegeke ngite kini kute nginikukhohlise, bengitawufika njengemnakenu. Futsi impela, yonkhe leminyaka lebengisolo ngilapha ngayo, Nkulunkulu univumele kutsi nibone ngandlelatsite kutsi ngi—ngiyanitsandza futsi ngingumnakenu.

⁹⁹ Futsi njengami lucobo, ngiyakholwa kusihlwa uma luHlwitfo belungafika, futsi bahamba ngekufaneleka kwenu, mhlawumbe bengitawuba wekugcina kuhamba. Angikusho loko kutsi ngitfobe, ngisho loko ngoba ngatalwa ngesikhatsi lebesingakabhekeki kini nine bantfu baloMlayeto lomkhulu.

¹⁰⁰ Kunebesilisa nebesifazane labahleti lapha, labanetinhloko letimphunga lebebashumayela liVangeli ngisengakatalwa. Impela, bafanelekile, bebasemuva lapho, naniphendlela nje loku indlela. Futsi benikulindzele, ngako sekulapha, ngako asikukholwe.

¹⁰¹ Manje, ngesikhatsi iNkhosi Jesu ilapha... Ngitotsatsa ingcikitsi yami yemkhankhaso kwentela labefikako... Futsi uma nonkhe lenike naba semhlanganweni phambilini ngibeketeleleni nje umzuzu.

¹⁰² Kuphilisa kwaNkulunkulu akusiyo intfo noma ngumuphi umuntfu langakwentela yona, kuyintfo letsite Umuntfu lotsite lasavele akwentele yona. Jesu Khristu wakufela eKhalvari, “Futsi Walinyatwa ngenca yetiphambeko tenu, nangemivimba yaKhe naphiliswa.” Lelo Livi. Khona-ke intfo kuphela Lebekangayenta bekukutsi Atibonakalise ngandlelatsite ngekushumayela Livi.

¹⁰³ Manje, nicaphelile na? U^Mnaketfu Osborn ungumshumayeli, bekangabeka Livi ngephandle lapho ngangekutsi bantfu baze baLemukele. Angikwati kwenta loko, kodvwa iNkhosi inginike lenye indlela yekukuletsa.

¹⁰⁴ Njengeliso nje noma umlomo, bewungeke usebentise kakhulu liso lakho kube bewungenawo umlomo. Nomangabe uyashumayela nomangabe uyabona, totimbili titiphiwo letimcoka temtimba uma umtimba uchubeka.

¹⁰⁵ Manje, ngesikhatsi Jesu Atibonakalisa kumaJuda, manje, ngiyanibuta, nomangasiphi sikhatsi eBhayibhelini Jesu atibonakalisa Yena lucobo kumaJuda, kutsi lena akusiyo yini indlela Lakwenta ngayo?

¹⁰⁶ Nathanayeli, noma, Filiphu waphendvuka ngenca yeNkhosi Jesu, bekaMbonile enta tibonakaliso letinkhulu netimanga. Wahamba kuyotfola umngani emamayela lamanengi, siyatjelwa, ngasentsabeni, ligama lakhe kwakunguNathanayeli. Bekalilunga lelibandla lelihle impela nendvodza leyetsembekile. NaNathanayeli bekangaphansi kwesihlahla akhuleka ngesikhatsi Filiphu enyuka, wase utsi, “Wota, ubone kutsi Ngubani lesimtfolile: Jesu waseNazaretha, indvodzana yaJosefa.”

Watsi, “Manje, kungabakhona yini lokuhle lokuvela eNazaretha, lokuphuma kulesosicuku entasi lapho?” Babi kwendlula bagiciki labangcwele, ngiyacabanga. “Kungabakhona yini lokuhle lokuvela lapho na?”

Futsi ngicabanga kutsi wamnika imphendvulo lenhle kunato tonkhe noma ngumuphi umuntfu lebekangayiniketa, watsi, “Wota, utibonele wena.”

¹⁰⁷ Futsi emgwacweni wacala kumtjela lemisebenti Jesu layenta, njengoba nginitjela manje, wamlungiselela lokwakungenteka. Ngani, sengiyamuva Filiphu atsi, “Nathanayeli, uyati kutsini? Ngesikhatsi Phetro enyukela kuYe, Bekangakaze aMbone, futsi Wamtjela kutsi ligama lakhe lalingubani, nekutsi uyise bekangubani, lapho bekhala khona.

¹⁰⁸ “Ngani, Ubona ngisho nemicabango yabo. Bantfu bebacabanga lokubi ngaYe, batsi Bekangu—ngumoya lomubi enta imisebenti, futsi Wagucuka wase utsi, ‘Nikhuluma loko ngekumelana neNdvodzana yemuntfu, nitawutsetselelwa kona; kodvwa uma Moya loNgcwele sekefikile futsi wakwenta, nakhuluma livi linye lelimelene naYe, ningeke nitsetselelwe kona.’” Loko kunamuhla, Jesu washo njalo.

¹⁰⁹ Manje, ngesikhatsi Nathanayeli nemngani wakhe, Filiphu, benyukela etetsamelini, kancane, lapho ticuku letinkhulu tatime khona, naJesu ashumayela noma abakhonta, Jesu wacondzisa emehlo aKhe ku... naku kufika lomunye webafundzi baKhe nendvodza lengakejwayeleki. Jesu wambuka futsi wanikwa emandla ngaMoya, futsi nalo liJuda leletsembekile, futsi Watsi,

“Bukani umIsrayeli, lokungekho nkohliso kuye!” Manje, Bekangeke amati ngekugcoka kwakhe, ngoba onkhe emadvodza bekagcoka ngalokufanako.

¹¹⁰ Naloko kwalitsintsa leliJuda lelincane, wase utsi, “Rabi, Ungati nini?” Ngaphandle kwaloko, “Awukaze ungibone, futsi angikaze ngiKubone.” Kodvwa Jesu Bekatibonakalisa. Watsi, “Awukaze ungibone, angikaze ngiKubone, futsi Ungati kanjani kutsi bengiyindvodza lelungile naletsembekile na?”

Ngani, Watsi, “Ngaphambi kwekutsi Filiphu akubite, ngesikhatsi ungaphansi kwesihlahla, Ngikubonile.” [Akucoshwanga etheyiphini—Umhl.]

¹¹¹ ...ufisa kuba nalamatheyiphu enkonzo yakusihlwa, vele ubhalele Leo Mercier, eJeffersonville, e-Indiana. Ulipela njani libito lakho Leo, sibongo? M-e-r-c-i-e-r. Ematheyiphu atsengiswa cishe ngetindleko, emadola lamatsatfu nentfo letsite, ngiyakholwa. Emadola lamatsatfu ngisho. NaLeo Mercier, eJeffersonville, e-Indiana. Yena u, naGene Goad naba bafana bematheyiphu, bafana bematheyiphu lasemtsetfweni emikhankhasweni. Futsi batsetse lesincumo lesi kute bakhone kuhamba yonkhe indzawo emhlanganweni. Babomnaketfu nebangani bami eVangelini.

¹¹² UMnumz. Goad lapha uvela ngco edolobheni lakho, noma, usondzele kulo lapha. UMnumz. Mercier bekaseKhatolika phambilini avela enhla lapha eMichigan ndzawanatsite, ngiyakholwa. Babumba iphathi yabo lencane ye-FBI base bayehla kutotfolo kutsi ngabe lesosiphiwo sasicinisile yini noma cha. Bakutfolo, njengoba iNkhosi ihlala yenta. Futsi manje sebaenami sikhatsi lesitsite. Sekusikhatsi lesingakanani nihamba nami, Mnaketfu Mercier? Iminyaka lemine. Ngabatfolo kutsi babebafana labetsembekile impela, khona ngco emgomeni. Futsi ngako, vele ubabhalele ngala—lamatheyiphu uma uwafisa ngemishini yenu yematheyiphu. Kulungile.

¹¹³ Lekucala, lesibili, lesitsatfu lesine. Ngubani lonelikhadi lekukhulekelwa lesihlanu na? Bekunguyiphi leyonombolo manje futsi? D? D, lesihlanu. Noma ngubani lonalo, phakamisa sandla sakho. Dzadze. Lesitfupha, ngubani lona D, lesitfupha? Lomnumzane lohloniphekile. Lesikhombisa. Ngekushesha manje, uma singatibona tandla tenu kanjalo... Lesikhombisa, lesiphohlongo. [Akucoshwanga etheyiphini—Umhl.]

¹¹⁴ Angikaze ngimbone lona wesifazane emphilweni yami ngekwati kwami. Sitihambi lomunye kulomunye, ngabe sitihambi, dzadze? Singito. Kute nje tetsameli ngephandle lapho titokwati njengoba sime lapha, phakamisa sandla sakho nje kute... bangahle bangayiboni inhloko yakho ivuma, kutsi a—asikaze sibonane phambilini. Futsi naku simile, wesilisa newesifazane. Ngiyabonga, dzadze.

¹¹⁵ Manje, ngitokhuluma naye umzuzwana nje, njengoba iNkhosi yetfu lebusisiwe yenta kulowesifazane e—emtfonjeni eSamariya. Futsi manje, uma iNkhosi Jesu ifuna kutibonakalisa Yona kuweTive khona-ke Itokwenta sento lesifanako Leyasenta ngalesosikhatsi. Ngabe kunjalo na? Uma Afana, Unalokufanako ngemgomo, lofanako eVini, lofanako emnyakatweni. Intfo kuphela Langafani kuyo, lowo ngumtimba waKhe wenyama, ngoba Usemtimbeni *wakho*.

¹¹⁶ “NgingumVini,” Watsi, “nine ningemagala.” Wagucuka waba kuKhanya lapho Avela khona, iNsika yeMlilo leyahola bantfwana baka-Israyeli, Wabuyela emuva kuLoko. Bangakhi lokukholwako loko na? Ngani, Washo njalo. Ngabe Wakufakazela na? Ngesikhatsi Pawula ahlangana naYe endleleni entasi lapho, BekakuKhanya, futsi ngesikhatsi Phetro asejele, BekakuKhanya; UkuKhanya lokuPhakadze.

¹¹⁷ Manje, uma lona, dzadzewetfu, lome lapha... Anginalwati kutsi uteleni lapha, angikaze ngikubone, a—angati ngisho nayinye intfo ngawe.

¹¹⁸ Kodvwa nyalo, kutawuba ngekuya kwendlela yakhe yekusondzela. Bangakhi kini elayinini lalabakhulekelwako nani khona lapho lowatiko kutsi kusondzela kwakho esiphiweni? Bangakhi lokwatiko loko na? Uma usondzela kuko ngenhlonipho yekutitfoba, utfola loko lokucelako; uma ungakwenti, awukutfoli.

[UMnaketfu Joseph Mattsson-Boze utsi, “Sitokutfokotela uma ningeke nitsatse titfombe lapho uMfundisi Branham asakhulekela labagulako, ngiyacela.”—Umhl.]

¹¹⁹ Yebo. Ngiyakubonga. INgelosi yeNkhosi ikuKhanya. Bangakhi labasibonile sitfombe saKo na? Asibone tandla tenu. Impela, kulapha, niyabona, banaso emuva lapho. SiseWashington, DC, siDalwa lesingetulu kwemvelo kuphela lesake safakazelwa nge...kutsi ku...Futsi, niyabona, bese-ke uma kuKhanya kweNgelosi kwehla, kukuKhanya lokukhulu nje, kuKhanya lokubukeka kumtfubi-sakubaluhlata satjani, futsi ngibuke loko kuKhanya, futsi Kutohamba futsi kuye etetsamelini, Kufanele ngikubuke, ngobe umbono unaloKukhanya. Bese-ke uma utsatsa sitfombe sekhamera, ngalesinye sikhatsi kungiphatsa kabi. Futsi ngako ngiyakutfokotela...

¹²⁰ Uma ufuna kutsatsa sitfombe khona manje, lomnaketfu lobekatsatsa, noma ngabe ngubani, wemukelekile khona manje. Kodvwa nje uma Ku...Uma sicala ekuboneni lokufihlakele, niyabona, kubona kutsi iNkhosi itokwenta yini...

¹²¹ Manje, uma iNkhosi itokwenta sento lesifanako lapha Leyasenta kulowesifazane emtfonjeni, bangakhi labatsi, “NgitoMkholwa ngesizotsa ngayo yonkhe inhliyo yami?”

122 Manje, Babe, Wena uyakubona loku, manje vumela uMoya waKho ute manje futsi ubonakalise uMlayeto, futsi uWumemetele kutsi uliciniso. Siphe kona, Babe. Ngoba sikucela, eGameni laJesu. Amen.

123 Uma iNkhosi leBusisiwe manje itokwembula kimi kutsi uteleni lapha, noma intfo letsite njengoba Yenta eBhayibhelini, njengoba Enta kuFiliphu, noma njengoba Enta kulabanye babo, lowesifazane emtfonjeni, noma leminye yemisebenti yaKhe, manje, uyati-ke uma singatani, kutofanele kube ngemandla langetulu kwemvelo kukwenta. Kodvwa-ke kutawuba ngekuya kwaloko locabanga kutsi kunjalo, uma utsi, “Ngumoya lomubi,” khona-ke utotfola umvuzo wamoya lomubi; uma ucabanga kutsi NguMoya waNkulunkulu, khona-ke utotfola umvuzo waNkulunkulu, kunjalo. Manje, kwangatsi Angakupha kona, ngumkhuleko wami locotfo.

124 Manje, sikhuluma ngekusondzela esiphiweni. Lowo wesifazane lomncane lowatsintsa sembatfo saKhe, wakholwa kutsi BekayiNdvodzana yaNkulunkulu, watfola nje loko lebekakucelile. Kodvwa lisotja laseRoma lelabeke si—sidvwedvwe etikwemehlo aKhe, futsi laMshaya enhloko, base batsi, “Manje, uma ungumprofethi, sitjele kutsi ngubani lokushayile,” akazange atfole lutfo ngaphandle kweluhambo loluya etindzaweni talabalahlwe kutsi angaphindzi abuye futsi. Kukusondzela.

125 Manje, uma iNkhosi Jesu ito...Uma ngitsite, “Sifazane, uyagula, naNkulunkulu utokuphilisa,” yebo-ke, be—bewungakungabata loko, bewuyodzingeka utsatse livi lami ngaloko. Kodvwa uma iNgelosi yeNkhosi itobuyela emphilweni yakho futsi—futsi yembule intfo letsite loke waba kuyo emphilweni yakho, njengoba Enta kulowesifazane emtfonjeni, noma intfo lefana naleyo, khona-ke utokwati kutsi ngabe lelo liciniso noma cha, utokwati loko. Khona-ke uto...Uma Akhona lapho, Ukhona yonkhe indzawo, ke, utokholwa. Uma Bekati kutsi kwakuyini, impela Utokwati kutsi kuyoba yini.

126 Manje, angati nje noma tetsameli tingaliva yini liphimbo lami manje noma cha, kodvwa emkhatsini wami nalowesifazane kume kuKhanya lokuPhakadze kwaNkulunkulu. Lowesifazane uyativela kutsi kukhona lokwentekako. Uyagula, unalokutsite lokungalungi, usolo abambe inhloko yakhe, uphetfwe yinhloko. Futsi unalokutsite lokungalungi ngengati yakhe, lokusifo sashukela. Liciniso lelo.

127 Uyakholwa? Manje buka, nawuchubeka ukhuluma naye, lokuningi bekutawushiwo. Njengoba lobu kubusuku bekugcina kwesikhashana, asikhulume nalowesifazane umzuzwana nje, ngako uma kukhona umuntfu lotiva kutsi loko kungaba nje kucagela loko. Hhayi netandla tetfu tiphakamele

kuNkulunkulu, bekungesiko kucagela. Lelo beculiphimbo lami, kodvwa bekungesimi lengikhulumako.

¹²⁸ Manje, loko Lakushito kuwe, angikwati, ngitokwati uma ngidlala letheyiphu, kodvwa noma ngabe bekuyini, bekuliciniso. Futsi ngiyabona bekuyintfo le...yebo, ngushukela engatini, sifo sashukela, futsi kubanga kushaywa siyeti, netinhlungu tenhloko, nakanjalonjalo.

¹²⁹ Bese-ke ngibona lomunye abonakala, longu—ngumfana, yindvodzana yakho, futsi uyamkhulekela, uyahlubuka, uyakhwesha kuNkulunkulu. Khona-ke kunalomunye umuntfu, longuwesifazane losakhulile lonawe manje, lapha, lowo ngumake wakho. Uma mine, ngaMoya loyiNgcwele, ngingakutjela kutsi make wakho ufunani, ucabanga kutsi bekangakwemukela na? Ngumlente wakhe. Kunjalo. Lelo liciniso. Awuveli kulelidolobha, uvela endzaweni lefana neRochelle, e-Illinois. Nkst. Fred Granear, lelo libito lakho, hamba uye ekhaya, uyakwemukela loko lokucelile. Kukholwa kwakho kukwentile. Nkulunkulu akubusise.

¹³⁰ “Uma ungakholwa, konkhe kungenteka.” Manje ninganyakati. Niyabona, ngamunye wenu ungumoya, futsi uma unyakata...Umoya wakho utfobela Moya loyiNgcwele manje, futsi uma unyakata, wenta lokutsite. Niyakhumbula Jesu wabakhipha, bonkhe, ngephandle kwendlu lapho Asavusa lentfombatana lencane iphila? [Akucoswanga etheyiphini—Umhl.]

¹³¹ Uyati sitsa siyokwenta wesabe, futsi ugijime, nayo yonkhe intfo, kodvwa loko kumnandzi, ufuna nje kukukhonta kanjalo. Emkhatsini wakho nami nguloko kuKhanya lokukhanyisa bantfu labeta emhlabeni. Futsi uma iNkhosi Jesu entsandvweni yaYo lebusisweni itongivumela kutsi ngati kutsi uteleni lapha, ungakholwa ngayo yonkhe inhltiyo yakho?

¹³² Unalokutsite lokungalungi emphinjeni wakho, inkhatsato, futsi unalokutsite lokungalungi esifubeni sakho. Kunjalo. Uyamkholwa loNkulunkulu lofanako lowakhuluma nebafundzi futsi wabati, usaphila nanamuhla na? Uhlala esitaladini lesitsiwa yi-Adam Street, inombolo yakho ngu 3239 West Adam Street. Ligama lakho unguMyrtle Bradford. Hamba ekhaya, Jesu sewukwentile... [Akucoshwanga etheyiphini—Umhl.]

¹³³ ...lapho etetsamelini, nesandla sakho kumfana wakho lomncane. Yebo, wena. Yebo, mnumzane. Bewusemikhulekweni ngalesosikhatsi. Futsi kukhona lokuhamba etikwakho, uyakwati loko, ngoba utsintse Intfo letsite. Awukaze ungitsintse, utsintse Yena. Futsi ukhuleka nesandla sakho sisetikwalomncane wakho, ngoba lomfana lomncane uphetfwe simo sekwetfuka lesimphatsa kabi kakhulu esikolweni. Lowo ngu ISHO KANJE INKHOSI. Manje uMoya usesetikwakho, beka sandla sakho etikwakhe.

¹³⁴ O Nkhosi Nkulunkulu, ngiyamekhuta lodeveli lohlupha lomntfwana, kwangatsi angamshiya. EGameni laJesu. Amen.

¹³⁵ Utoba nako lolokucelile, ungakhatsateki.

¹³⁶ Lendvodza ingemayadi langemashumi lamatsatfu kusuka kimi. Itsintseni na? Nkulunkulu washo eVini laKhe kutsi UngumPhristi loMkhulu lonekuvelana nebutsakatsaka betfu. NiyaMkholwa.

¹³⁷ Uyakholwa, dzadze? Ngiyabonga. Uma Moya loyiNgcwele atongatisa kutsi ufunani, njengoba nje Entile kuleyondvodza ngephandle lapho (Unalo likhadi lekukhulekelwa, naku ulangembali, leyondvodza ihleti nje etetsamelini.), utokholwa na?

¹³⁸ Awukatiteli wena lapha. Unenkhsatsato yebesifazane, kodvwa akukukhsatsati kakhulu. Kodvwa u—ulapha ngenca yemyeni wakho, futsi akekho lapha, kanjalo naye akekho kulelidolobha, kanjalo nakulesifundza lesi. Usesifundzeni lapho kunencumbi yemachibi, eWisconsin. Uphetfwe sifo sebucopho nemgogdla, futsi akasindziswa, futsi ukhatsalele kakhulu umphefumulo wakhe kunekuphiliswa kwakhe. Lowo ngu ISHO KANJE INKHOSI. Manje, leliduku lotokwesula leto tinyembeti ngalo, ulibeke etikwakhe futsi ungangabati, ungaba nako lolokucelako. Amen. INkhosi ikubusise, dzadze.

¹³⁹ Sawubona? Ngicabanga kutsi sihlanguana kwekucala. Kunjalo.

¹⁴⁰ Uyakholwa kutsi Nkulunkulu uyasiphilisa sifo sesitfutfwane, mnumzane, lohleti ekugcineni kwetitulo emuva lapho na? Uyakholwa kutsi Utokusindzisa na? Uma ukholwa ngenhlitiyo yakho yonkhe futsi ukwemukele, ungaba nako kuphiliswa kwakho.

¹⁴¹ Ngenca yekutsi ukuqeqile, ucabangani ngako, uhleti lapho, ungibuka ufake tibuko, uphetfwe sifuba semoya? Uyakholwa kutsi Nkulunkulu utokusindzisa na? Khona-ke kwemukele. Umhum. Amen.

¹⁴² Ngicela kwenta lenye intfo. Kulungile, dzadze, ujabule kakhulu, uhleti lapho nenkhatsato yenhhlitiyo, Ukuphilisile, nawe. Kulungile. Amen.

¹⁴³ Kholelwani nje eNkhosini Jesu. UnguLomuhle kunetinkhulungwane letilishumi, iMbali yaseSharoni, neMnduze wesiGodzi, iNkhanyeti yeKusa.

¹⁴⁴ Angikacondzi kukugcina lapho, dzadze, ngifanele nje ngihambe njengoba Ahamba. Sitihambi lomunye kulomunye? Uma Moya loyiNgcwele, ngekuvuka kweNkhosi, atongitjela kutsi ukhulekela ini, ume lapho nemehlo akho avalawe, utokholwa ngenhlitiyo yakho yonkhe na? Akukhombisi, kodvwa unesifo selibilo lelingekhatsi. Futsi unesimo sekwetfuka kakhulu losikhulekelako. Ungakhatsateki, loko sekuyakuyekela.

Awusuye wakulelidolobha, noma wakulesifundza lesi, noma wakulesive lesi, ungumCanada. Uvela e-Ontario, live lelikhulu lemsedari, uwisiye ngisho walapha, kulokuhlala kuluhlata.

¹⁴⁵ Ukhulekela lomunye umuntfu, futsi, etulu lapho, sihlobo, wesifazane. Futsi unemdlavuza, futsi loko kusedlaleni lelibilo. Beka liduku lakho etikwakhe, futsi utosindza, naye, uma kuphela utokholwa.

¹⁴⁶ Nkulunkulu Somandla, phani tibusiso leticeliwe. Amen.

¹⁴⁷ Nkulunkulu akubusise manje. Ungangabati, kholwa nje.

¹⁴⁸ Ninganyakati ngiyacela. Uma nje nitolindza leminye imizuzu lembalwa, sito—sito... Hlalani nje... [Akucoshwanga etheyiphini—Umhl.]

¹⁴⁹ O, kwangatsi iNkhosi lenhle yaseZulwini ingasipha kona. Bekundzawanatsite. Lindzani, sitocala ngalomuntfu lona. Manje, uma nje ninginika cishe lesihlanu, imizuzu lelishumi.

¹⁵⁰ Ngiyacabanga ngisihambi kulodzadze. Ngabe kunjalo, dzadze? Sitihambi lomunye kulomunye. INkhosi Jesu iyakwati. Uyakholwa kutsi Ingembula kimi kutsi iyini inkhatsato yakho na? Ulapha ngenca yelicolo lakho, unesimo selicolo lesabangelwa sentakalo esibhedlela ekuhlindweni. Kunjalo. Uyakholwa kutsi Utokusindzisa na? Bakubita nga-Ann Roblee. Uvela emacentselweni alelidolobha. Leyo yindvodzakati yakho leme khona entasi lapho. Unamdlavuza wesikhumba. Nikela likhadi lakho bese ubuyela esitulweni sakho. Umyeni wakho unekushaywa siyeti, mtjele nje kutsi akholwe, futsi nonkhe nobatsatfu nitophiliswa, eGameni leNkhosi. Manje hamba ukholwa, bani nekukholwa, ungangabati.

¹⁵¹ Umzuzwana nje. Lodzadze lomncane lohleti lapha nenhloko yakhe ikhotseme, ngemuva nje kwalomnumzane lohloniphekile, lonesimila, uyakholwa kutsi Nkulunkulu ukuphilisile ngalesosikhatsi ngesikhatsi ukhuleka na? Uyakholwa na? Jikitisa sandla sakho uma ukwemukela. Kulungile, ungaba nako.

¹⁵² Ngekutsi Usondzele kakhulu kuwe, lodzadze losedvute nawe lapho uphetfwe simo seliso. Uyakholwa kutsi Nkulunkulu utokuphilisa, lodzadze lolikhalatsi na? Yebo, memu. Kulungile. Uyakhukholwa na?

¹⁵³ Ucabangani, uhleti eceleni kwakhe, unesifo sekucacamba kwematsambo na? Uyakholwa kutsi Nkulunkulu utokuphilisa na? Phakamisa sandla sakho futsi ukwemukele. Kulungile, khona-ke ungaphiliswa.

¹⁵⁴ O, bani nekukholwa kuNkulunkulu, ungangabati.

¹⁵⁵ Lendvodza eceleni kwami lapha, a—angikwati, mnumzane, sitihambi lomunye kulomunye. Manje, uma ungakholwa, konkhe kungenteka kulabo labakholwako.

156 Kukhona lokwentekile, bekuyindvodza. Lomnumzane lohloniphekile lohleti ngalapha, khona emuva lapho nentfo letsite, lemhlophe, logcoke lihembe lelibukeka lisikoshi, ne... ngani, unenkhatsato yenhliyo. Uma atokholwa ngenhliyo yakhe yonkhe, iNkhosi Jesu itokuphilisa. Uyakukholwa.

157 Lolandzelako, kunekudzabuka kwenyama. Uyakholwa kutsi Nkulunkulu utokuphilisa futsi akusindzise na? Uyakukholwa na? Khona-ke ungaba nako.

158 Kulungile, bani nekukholwa. Ungangabati.

159 Lendvodza lehleti eceleni kwakho inenkhatso yesisu lefuna iNkhosi imphilise, lomncane, umfo lobukeka azacile netinwele takhe tikanywe tabhekiswa emuva *kanjalo*, igcoke bhothayi. Unesisu lesiguliswa yimizwa, mnumzane. Uyakholwa kutsi iNkhosi Jesu ikuphilisile na? Ikwentile. Tono takho setihambile. Bonga nje.

160 O, bewungalingabata kanjani liWundlu laNkulunkulu leliligugu na? Bangakhi lokholwako kutsi Uvukile kulabafile, kutsi Ulapha, kutsi lomlayeto ucinisile kutsi Unguye itolo, namuhla, naphakadze na?

161 Yini lesele na? Yini lengentiwa na? Sula lobumnyama lobuncane ebusweni bakho, nangasemehlweni akho, futsi agcotjwe ngemutsi wekugcobisa emehlo waNkulunkulu, futsi nje uMemukele. Mkhohlweni. Yini lenye Langayenta na? Nine leninemakhadi, nine leningenawo emakhadi, akunandzaba.

162 Dzado lomncane lohleti embikwami ngco kuvulande losesitezi nenkhatsato yabodzadze, lohleti lapho, uyakholwa kutsi Nkulunkulu utokusindzisa? Uma ukholwa (Yebo, memu.), ungaba nako lolokucelile. Nkulunkulu akubusise. Ukuphilisile.

163 Wena, mnumzane, manje uyakholwa ngenhliyo yakho yonkhe. Siihambi lomunye kulomunye, angikaze ngikubone emphilweni yami. Futsi ngitokutjela manje: Lesi sikhatsi sekucala lowake wangibona ngaso, awukaze ube kulomunye wemihlangano yami phambilini, lesi sikhatsi sakho sekucala. Kunjalo. Futsi ulapha uphetfwe yintfo lengalungi emphinjeni wakho, futsi unenkhatso yesisu. Kunjalo. Kucumba esiswini sakho, unekwetfuka. Bewuvamise kuba nemsebenzi lonemahloni ngawo manje, wasebenta emidangalazweni yasebusuku, bewungumjabulisi emidangalazweni yasebusuku. Kunjalo. Ligama lakho ungu-Edge, R. H. Edge ligama lakho.

164 Umkakho ulapha nawe, usemhlanganweni. Uma Nkulunkulu atongitjela kutsi yini lengalungi ngemkakho, utokwemukela kuphiliswa kwakhe, naye? Lunyawo lwakhe. Kunjalo. Liciniso. Awusuye wakulelidolobha, uwasendzaweni... ungaphansi kwelidolobha lelikhulu, eningizimu yelidolobha lelikhulu, cishe emamayela langemashumi lamabili nesihlanu, eSpringfield, e-Illinois. Manje hamba uye ekhaya futsi wemukele kuphiliswa kwakho

futsi usindze, eGameni leNkhosi Jesu. Nkulunkulu akubusise, mnumzane.

165 Bani nekukholwa kuNkulunkulu. Uyakholwa?

166 Ucabanga kutsi Nkulunkulu angasiphilisa lesosifo sekucacamba kwematsambo na? Uma ungakukholwa.

167 Ucabangani, uhleti lapho, dzadze? Wota lapha umzuzu, mani khona lapho umzuzu. Wota lapha, dzadze. Ucabanga kutsi Nkulunkulu angasiphilisa lesosifo sashukela futsi akusindzise na? Uyakhukholwa na? Kulungile, uma ungakukholwa, ungaba nako lolokucelile. Kulungile.

168 Ucabangani, dzadze. Wota lapha umzuzu. Ubuheka njengewesifazane lophilile, kodvwa unesifo sekushodelwa yingati. Uyakholwa kutsi Nkulunkulu utokusindzisa? Uyakholwa.

169 Bangakhi khona lapho lonesifo sashukela na? Manini ngetinyawo tenu umzuzu nje, nitobona inkhatimulo yaNkulunkulu. Bangakhi khona lapho lonesifo sekucacamba kwematsambo, lotokuma ngetinyawo takho na? Bangakhi ngephandle lapho lonesifo sekushodelwa yingati na? Manini ngetinyawo tenu, nomakuphi, akunandzaba kutsi ukuphi. Wonkhe develi utofanele amlalele Nkulunkulu. Impela, utokwenta. Kulungile.

170 Dzadze, lapha, wota lapha nje umzuzu nje. Ngifanele ngikutfole emkhatsini walabo besifazane. Uyakholwa kutsi Nkulunkulu angasiphilisa lesosimila futsi akusindzise na? Uyakhukholwa na?

171 Bangakhi lolungiselela kuba wesimila manje? Sukuma ume ngetinyawo takho.

172 Develi wehluliwe. Akubiti licembu lonkhe, kubita bucotfo nje, kubita nje uma ukholwa futsi ube nekukholwa.

173 Dzadze sukuma lapho, yenyukela khona lapha. Nonkhe nine leninenkhatsato yelicolo njengalod zadze, sukumani nime ngetinyawo tenu. Kholwani ngayo yonkhe inhliyo yenu.

174 Niyabona kutsi ngicondze kutsini na? Bangakhi lophetfwe kwetfuka na? Manini ngetinyawo tenu. Loko kukuso sonkhe lesakhiwo. Impela. Ngiyakuva, ngiyakwati.

175 Umdlavuza, mani ngetinyawo takho. Uyakholwa na? Noma ngubani lonanoma yini lengalungi ngabo, mani ngetinyawo takho.

176 O, *Loku* ngu*Lokwa*! Phetro watsi, ngeluSuku lwePhentekhosti, "*Loku* ngu*Lokwa*." Nguloku... Nime ngetinyawo tenu, manini manje eBukhoneni baJesu Khristu, iNdvodzana yaNkulunkulu. Niyakholwa ngesizotsa kutsi Bukhona baKhe bulapha na? Phakamisani tandla tenu.

Khulekani nami. “Umkhuleko wekukholwa utomsindzisa logulako, naNkulunkulu uyobavusa.”

¹⁷⁷ Wonkhe develi wehluliwe. Aniboni na? Uyadalulwa, utofanele akushiye, utohamba uma umvumela ahambe khona manje, Khristu umcosha kuwe.

¹⁷⁸ O Nkulunkulu, eGameni laJesu, ngekhuta wonkhe develi lobambe labantfu laba.

¹⁷⁹ Phuma kubo, Sathane, kutsi bangaphiliswa, eGameni laJesu Khristu, iNdvodzana yaNkulunkulu!

¹⁸⁰ Phakamisani tandla tenu manje futsi niMdyumise, futsi nikhululeke eGameni leliNgcwele laJesu Khristu. 

58-0112^E Umnyango Loya ENhlitiyweni
ELane Tech High School
EChicago, E-Illinois E-U.S.A.

SWATI

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Inotsisi yelilungelo lemtsetfo

Onkhe emalungelo agodliwe. Lencwadzi ingaprintwa ngeprinta yasekhaya yentelwe kutsi umuntfu atisebentisele yena noma kutsi iniketwe labanye, mahhala, njengelithulusi lekusabalalisa liVangeli laJesu Khristu. Lencwadzi akukamele itsengiswe, iphindze ikhicitwe tibetinengi, iposwe kuwebsayithi, igcinwe ngeluhlelo lwekutsi iphindze itfolakale, ihunyushelwe kuletinye tilwimi, noma isetjentiselwe kuticelela timali ngaphandle kwemvumo lebhaliwe lecondzile ye Voice Of God Recordings®.

Mayelana nelwazi lolwengetiwe noma lwalwenye impahla lekhona, sita uchumane ne:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org